





古今原始第十四卷

桐城趙鈇昂卿著

○大明

太祖高皇帝

詔改太平路為太平府

從此不復稱路矣

殿新成命博士熊昂類編古人行事可為鑒戒  
者書于殿壁又命侍臣書大學衍義于兩廡壁  
間曰前代宮室多施繪畫今書此以備朝夕觀



覽豈不愈于丹青乎

以嘉言善事列 殿壁代丹青古今僅見也

命百官禮儀俱尚左改李善長為左相國

尚左始此

以李善長為太子少師兼詹事馮勝兼副詹事  
楊憲傳獻兼府丞徐達兼太子少傅常遇春兼  
太子少保鄧愈湯和兼太子諭德章溢兼太子  
贊善大夫劉基兼太子率更令

以大臣兼東宮始此先是

上諭善長等曰朕於東宮不別設府僚而以卿  
等兼之者蓋軍旅未息朕若有事於外必留  
太子監國若設府僚卿等在內事當啓聞太  
子或有聽斷不明而與卿等意見不合卿等  
必謂府僚導之嫌疑由是而生朕所以特置  
賓客諭德等官以輔成太子德性且妙選名  
儒為之賓友

聖祖此見真超越千古

定衛所官軍及定將帥將兵之法其法自京師



達於郡縣皆立衛所大率以五千六百人為一衛一千一百二十人為一所一百一十二人為一百戶所每百戶所設總旗二名小旗十名管領鈐束通以指揮使等官領之大小相聯以成隊伍有事征伐則詔總兵官佩將印領之既旋則上所佩將印於朝官軍各回本衛大將單身還第權皆出於朝廷不敢有所擅調自是征伐率以為常

此佩印充總兵之始也

### 詔衣冠悉復唐制

按衣冠文物始復中國之舊先是元世祖起自朔漠以有天下悉以胡俗變易中國之士庶咸辮髮椎髻深簷胡帽衣服則為袴褶窄袖及辮線腰褶婦女衣窄袖短衣下服裙裳無復中國衣冠之舊甚者易其姓氏為胡語俗化既久恬不知恠

上心又厭之及克元都乃詔衣冠悉復唐制士民皆束髮於頂官則烏紗帽圓領束帶黑靴



士庶則服四帶巾雜色盤領衣不得用黃玄其辮髮胡髻胡服胡語一切禁止

詔開科取士定科舉格初場各經義四書一道二場論一道詔誥表箋内科一道三場策一道中式者後十日以騎射書筭律試之

立三場試格始此後有增損

以濠州為中立府定為中都先是議建都汴梁上意不欲群臣多言臨濠帝鄉可建都者乃詔改為中立府取中天下而立定四海之民之義

號曰中都後以議止改中立府為鳳陽府雖不建都猶設中都留守司

稱中都始此

令天下郡縣設義塚禁止浙西等處火葬水葬凡民貧無地以葬者所在官司擇近城寬閑地立為義塚敢有狗習元人焚棄屍骸者坐以重罪命刑部著之律

立漏澤園始此

詔嶽鎮海瀆諸神前代加以封號非宜今並改



正以山水本名稱其神郡縣城隍神號一體改正止稱某府某縣城隍之神

按嶽鎮海瀆城隍去封號始此

詔戶部籍天下戶口置戶帖書各戶之鄉貫丁口名歲以字號編為勘合用半印鈐記籍藏於部帖給於民令有司點閱比對

戶帖始此

詔徵江南諸郡民凡稱大家者悉赴闕造之於庭親訓諭之凡天地陰陽性命仁義古今治亂

盛衰紀綱法度風俗政治得失之故諄諄累數千百言又恐其遺忘而不能詳刻而為書以摹本分賜之名曰教民榜

榜諭始於此

置六科給事中掌參駁糾劾之事

分給事中為六科始於此

詔天下鄉貢舉人罷會試開文華堂於禁中命選舉人年少曾美者肄業其中儒臣宋濂桂彥良分教之光祿日給酒饌又選成均之秀入武



英堂俾練習政事

教士禁中僅見於此

禁四六文辭

國初凡在外司府州衛等衙門所進表箋皆令學官為之以聲音字樣犯忌諱被誅者多後令翰林撰為定式如

聖節冬至正旦賀表之類臨時惟書謄以進而

已

制子為父母庶子為其母皆斬衰三年嫡子衆

子為庶母皆齊衰杖期五服亦稍有升降編輯成書使內外遵守

庶子為其母斬衰今制也可謂能體孝子之心矣

定外官朝覲以三年為期及還任各賜勅一道以申戒飭

朝覲官領

勅自此始因以辰戌丑未為期

定服色花樣公侯駙馬伯麒麟白澤文官一品



原如  
第一四卷  
六  
二品仙鶴錦雞三四孔雀雲鴈五白鷓六七鷺  
鸞鷓八九黃鸝鶴鶉練鵲風憲官用獬豸武  
官一二獅子三四虎豹五熊羆六七彪八九品  
犀牛海馬

服制之章定於此

改各行中書省為承宣布政使司

布政使司之設始於此

定文官應封贈祖父母父母父母妻室者照依資格  
一品贈三代二品三品贈二代四品至七品一

代照見授職事

始定回品受封例

定諸子應封父母嫡母在生母不得封如已亡  
則皆封若生母未封贈不得先封其妻

後又有告乞移封者

恩亦浩蕩矣

定公侯

誥用玉軸一品官同伯用犀軸二品官同三品  
四品用抹金軸五品以下用角軸



原如  
第十四卷  
誥軸之等始定

置通政使司掌出納諸司文書敷奏封駁之事  
以曾秉正為通政使

通政使之設始於此

制內侍不許讀書識字

按內侍不許讀書識字始於此後

宣廟始以翰林官教之於內侍監

朝參文武百官給牙牌懸帶出入以防姦偽

朝臣懸帶牙牌始於此

南番彭亨國及百花國各遣使奉金葉表文來  
朝貢

二國前代皆未嘗通中國者

定致仕官處鄉黨之禮惟於族內序尊卑如家  
人禮其於外祖及妻家亦序尊卑若筵宴則設  
別席不許坐於無官者之下如與異姓致仕官  
會則序爵爵同則序齒其與異姓無官者相見  
不須答禮庶民以官禮謁見敢有凌侮者論如  
律



致仕官居鄉之禮始於此

革中書省罷丞相等官不設陞六部為正二品  
衙門分理天下庶務改大都督府分設左右前  
後中五軍都督府

以丞相胡惟庸謀逆之故也

創編賦役黃冊以一百一十戶為一里推丁糧  
多者十人為里長餘百戶分為十甲歲役里長  
一人管攝一里之事城中曰坊近城曰相鄉都  
曰里十年一週每里編為一冊冊首總為一圖

鰥寡孤獨不任役者則帶管於一百一十戶之  
外而列於圖後名曰畸零冊成一本進戶部各  
布政司及府州縣各存一本十年攢造一次遂  
為定制

十年一造黃冊始定於此

頒五經四書于北方學校

五經之外有四書始定於此

置錦衣衛及鎮撫司先是置儀鑾司至是改為  
衛所隸有大漢將軍力士校尉人等專掌直駕



侍衛巡捕等事若有重囚下本衛鎮撫司推鞠  
始立錦衣衛及鎮撫司

令各衙門用半印勘合行移

先是各布政司因循舊弊用空印紙於各部  
查得錢糧軍需有差錯改正却將空印紙填  
寫咨呈補卷事發大行考較將各官多論死  
謫發遂議用半印勘合出納關防其勘合之  
制今在京五府六部都察院衙門各置簿籍  
二扇合空紙之半照各地方編寫字號押印

完畢外號底簿發諸都布按司直隸府州衛  
所收掌內號底簿并勘合紙本衙門收貯凡  
行移在外事務發勘合科填寫號紙下各地  
方比照硃墨字號相同將開去事件奉行完  
報如號紙盡絕照字號編接如前各該司府  
州衛候年終將發去勘合底簿拆粘具本奏  
繳仍具青冊一本送原發衙門以憑稽查比  
較遂為定制

制除官開寫年籍從軍脚色赴



內府清理明白寫黃仍寫內外貼黃正黃關防  
走號合同請寶鈴記正黃送銅櫃收貯內外黃  
各置文簿附貼亦於

內府收掌遇有陞調罷替貼揭續附

按貼黃武職最重吏弊莫甚於此

定戶部為十二部各清理一布政司戶口錢糧  
仍帶管直隸府州分為民度金倉四科

戶部十二部定於此後改為清吏司增雲貴  
去北平矣

上辛太學還

太后聞太學諸生有携挈妻孥者無所仰給勸  
月以糧給其家遂為永制

諸生月糧始於此

選高僧分侍諸王

此又一制也

刑部掌天下刑名其屬古有四部曰憲部比部  
司門部都官部洪武二十三年因天下庶務浩  
繁改為十二部曰浙江江西福建山東北平四



川山西湖廣廣東廣西河南陝西各令清理一  
布政司刑名等事其雲南布政司隸陝西部仍  
量其繁簡帶管直隸府州并在京衙門後改為  
清吏司未樂間革北平清吏司增雲南貴州交  
趾三清吏司宣德間革交趾清吏司浙江部帶  
管

刑部始定為十三司

置殿閣學士以禮部尚書劉仲質為華蓋殿大  
學士翰林院學士宋訥為文淵閣大學士

具伯宗為武英殿大學士典籍吳沉為東閣大  
學士

始設殿閣學士

上以海外諸國進貢信使往來真偽難辯遂命  
禮部置勘合文簿發諸國俾往來俱有憑信稽  
考以杜姦詐之弊但遇入貢咨文具於所經各  
布政司比對勘合相同然後發遣於是暹羅占  
城琉球等五十九國俱給勘合文冊  
給諸番國勘合始此



勅內官毋預外事凡諸司毋與內官監文移往來

與內官監文移往來有禁始此

改御史臺為都察院

始稱都察院定官制

議取各處工匠驗其丁力以三年為限更番赴京輸作名曰輸班匠免其家徭役著為令

始有輸班匠

遣國子監生武淳等往各處隨其稅糧多寡定

為幾區區設糧長四人使集糧長耆民躬履田畝以量度之圖其田之方圓次其事悉書主名及田之四至編彙為冊其法甚備謂之魚鱗圖冊

魚鱗圖冊始此革貼脚詭寄之弊也

御制大誥三編成頒示天下先是戶部侍郎郭桓等犯賊事覺連坐者衆因此作大誥頒示天下令一切官民諸色人等戶有此一本若犯笞杖徒流罪名每減一等無者每加一等



大誥減等始於此今相沿皆有減等而無加  
等字矣

廷試進士賜任亨泰等及第出身有差  
上命有司建狀元坊以旌之

聖旨建坊自此始

置詹事府秩正三品以兵部尚書致仕唐鐸為  
詹事

始立詹事府古有詹事官未專稱府也

詔以元良哈之地置朶顏泰寧福餘三衛元良

哈古山戎也歷代為渾莫奚為奚契丹時大軍  
征胡朶顏元帥等各差人來朝願為外藩以其  
地置三衛自全寧抵喜峰近宣府曰朶顏自錦  
義歷廣寧至遼河曰泰寧自黃泥窪踰瀋陽鐵  
嶺至開原曰福餘以其酋為指揮等官各統所  
部自是每歲朝貢

朶顏三衛之設始於此

上以學校為國儲才而士子巾服無異吏胥宜  
有以甄別之命工部製式以進必求典雅凡三



易其制始定由是士子衣冠綽有古風焉

定生員巾服之制始此

上微行至神樂觀見一道士於窓下結網巾問曰此何物耶對曰此網巾也用以裹之頭上則萬髮皆齊矣明日朝罷召結網巾道士為道官取網巾十三頂頒示十三布政司使人無貴賤皆首裹網巾遂為定制

此歷代所未有也

頒大成樂器于天下令有司如式製造以祀孔

子

孔廟始有大成樂器

令更定武職比試罷職例凡內外指揮千百戶子孫未及二十歲者罷職至年二十乃比試初試不中罷職者惟食半俸二年後再比中者食全俸仍不中者降充軍

國初比試之嚴如此此武職所以多可用者選才間右以浦江鄭沂為禮部尚書鄭榦為監察御史



洪武中多選用稅戶人材湖州富民嚴震直授布政司參議累官至尚書蘇州富民沈萬四有孫曰玠擢戶部員外郎玠受官辭祿上器重之他如丘顯湯行之屬皆大戶此亦立賢無方之意也

命禮部會同翰林院考國子監六堂師弟子甄別高下送吏部以次擢用

太學生始以次擢用

詔天下郡縣夏稅秋糧自洪武二十八年以前

拖欠未納者許折輕齋隨地方出產聽從民便以免轉運每金一兩折米二十石銀一兩折米四石鈔三貫五百文折米一石絹每一疋折米一石二斗綿布每一疋折米一石夏布每一疋折米七斗淨綿花每一斤折米二斗

輕齋之議始見於此

成祖文皇帝

定官俸米鈔兼支例令在京文武官俸一品二品四分支米六分支鈔三品四品米鈔中半兼



支五品六品六分米四分鈔七品八品八分米二分鈔每新鈔二錠折米一石九品雜職及吏典旗軍並全支米從戶部尚書夏原吉等之議也

按此官俸折鈔之始累朝以來又有折布折絹折鹽折贓罰庫衣服胡椒蘇木事例正統以後則有二分支米八分支鈔或三分米七分鈔雖九品雜職無不皆然者矣

以北平為北京設北京留守行後軍都督府及

北京行部以郭容六雜僉並為行部尚書所屬分置吏戶禮兵刑工六曹清吏司

六曹始稱清吏司又有行在六部之稱

改北平府為順天府

始立順天府

戶部尚書郁新等言淮河至黃河多淺灘跌坡餽運艱阻請自淮安舟船可載三百石以上者運入淮河沙河至陳州潁岐口跌坡下復以淺船可載二百石以上者運至跌坡上別以大船



載入黃河至入柳樹等處令河南車夫運赴衛  
河轉輸北京從之

始有淺船

命內臣齊喜提督廣東市舶

內臣提督市舶始此

定新舊武職比試廕襲例令洪武三十二年至  
三十五年奉天征討獲功陞職者為新官子孫  
年十六出幼穉替免比試三十一年以前者為  
舊官子孫年十五出幼穉替俱比試永樂元年

以後獲功者出幼比試與舊官同

有新官子孫舊官子孫比試之別

海西女直野人頭目來朝設建州毛憐必里兀  
者赤不罕等衛封其頭目為都督都指揮千百  
戶鎮撫等官賜印及誥俾仍舊俗各統其屬以  
時朝貢自後東瀕海北至奴兒于海悉境皆來  
歸附自開原迤北因其部族建置奴兒于都司  
一為衛者三百八十四為千戶所者二十四為  
站為地面者各七



分女直地建置都司衛所始此

命學士解縉等選新進士才識英敏者俾就文淵閣進其學於是縉等選修撰曾棨編修周述周孟簡庶吉士楊相劉子欽等凡二十八人以應二十八宿時庶吉士周忱自陳年少願進學上喜增忱為二十九人遂命司禮監給紙筆墨光祿給朝暮膳仍命解縉領其事

庶吉士之設始此

把都等來歸

上大喜命把都為右軍都督僉事賜姓名吳允誠倫都兒灰為後軍都督僉事賜姓名柴秉誠其部屬保住為陝西行都司都指揮僉事賜姓名楊効誠餘為指揮千百戶鎮撫復賜冠帶罷衣文綺表裏白金鈔錠有差命居涼州仍給與牛羊孳牧衣鞋布鈔令總兵宋晟加意撫恤俟居處既定選其中勇壯數百叅以官軍於塞外偵邏

賜把都帖木兒官爵姓名分處涼州始此



置交趾都指揮使司以都督僉事呂毅掌司事  
黃中為副布政司以尚書黃福兼掌之以前工  
部侍郎張顯宗為左布政使餘皆選人以充置  
十七府五州以統諸州縣置十衛二千戶官軍  
以守之

置交趾布政司始此時永樂五年

設四夷館選國子監生教習四方番夷翻譯文  
字分為八館曰韃靼曰女直曰西番曰西天曰  
回回曰百夷曰高昌曰緬甸

始設四夷館

命工部尚書宋禮等發山東丁夫開濬會通河

會通河故元運河也洪武二十四年河決原

武漫過安山湖而會通河遂淤自是南運舟

楫不通而立陸路遞運所往來者悉皆至德

州下河未樂初建北京立運法自海者踵元

人之舊由直沽達京自河運者由江入淮由

淮入黃河至於陽武發山西河南丁夫陸運

至衛輝下河舟運至京是時海運險陸運費



濟寧州同知潘叔正建言舊會通河四百五十餘里其淤塞者三之一浚而通之可免通運之勞實國家無窮之利遂

命宋禮及刑部侍郎金純都督周長發山東六郡丁夫十餘萬開濬以復故道禮用老人白瑛計築壩于汶上縣之戴村橫亘五里過汶盡出于南旺至分水龍王廟分為二水四分南流以接徐沛六分北流以達臨清又相地勢高下增修水閘以時啓閉便蓄洩自分水

至臨清地降九十尺為閘十有七而達于漳御南至沽頭地降百十有六尺為閘二十有一而達于河淮自是河成糧運便利京儲充足

始置貴州布政司及思州等府洪武中止設貴州思南思州諸宣慰司管束土民及設都指揮使司鎮守其地既而思南宣慰使田宗鼎與思州宣慰使田琛數相攻殺抗拒朝命乃勅鎮遠侯顧成以兵擒之尚書夏原吉等議以思州所



轄二十二長官司分設思州新化黎平石阡四  
府思南所轄十七長官司分設思南鎮遠銅仁  
烏羅四府而於貴州設布政使司以總之

貴州布政司設于永樂十一年

北京行太僕卿楊砥言近日馬蕃息而少牧養  
之人請令民五丁養種馬一匹每馬十匹立群  
頭一人五十匹立群長一人養馬之家歲免其  
糧草之半尋令民養種馬者二歲納駒一匹凡  
種馬倒死孳生不及數皆令倍償

北方養馬之害起於楊砥

勅修武當山宮觀成賜名曰太嶽太和之山

武當山始改名太和山

仁宗昭皇帝

上以文淵閣大學士楊榮金幼孜等輔道積有  
年勞陞榮為太常寺卿幼孜為戶部右侍郎仍  
兼前職陞左春坊大學士楊士奇為禮部左侍  
郎兼華蓋殿大學士前右春坊大學士黃淮為  
通政使兼武英殿大學士俱掌內制不預所陞



職務以前洗馬楊溥為翰林院學士

按我

朝以九卿等官兼殿閣學士掌機密始此  
進蹇義少傅加楊士奇少保並兼職如故加楊  
榮太子少傅兼謹身殿大學士金幼孜太子少  
保兼武英殿大學士

內閣位進三孤始于楊金

賜蹇義楊士奇楊榮金幼孜銀圖書各一其文  
曰繩愆糾謬

賜銀圖書始於蹇義楊士奇楊榮金幼孜

大理寺奏決重囚

上曰人命甚重命五府六部通政司六科同三  
法司於承天門會審

此府部九卿科道每歲會審之始也

令直隸及近各都司官軍更番於京師操備從  
英國公張輔兵部尚書李慶等之請也

上諭之曰古者務農講武皆有定期故兩不偏  
廢今宜略倣此意無廢屯種令畢農事而後來



先農事而遣歸庶皆不妨誤

按此外衛官軍更番京操之始也

追贈兵部尚書金忠少師謚忠襄以其子達為翰林檢討達年始十歲令還鄉支俸

幼童廕官始此

加太子少傅大學士楊榮兼工部尚書三俸並支

三俸兼支始于文敏

上諭禮部尚書呂震曰朝臣在外久者今皆令

還鄉展省其得誥勅者足為家鄉之榮然到家有養祭賓客之需往返道途之費計其在官俸祿給日用外有餘貲鮮矣自今歸者皆賜鈔一品賜鈔五千貫三品四千貫餘有差於是大學士金幼孜左春坊大學士王英等並乞歸省焉後定為十年始放歸省歸省之制前所未有也

選方面官叅贊各邊軍務

上以武臣踈於文墨乃選任方面官於各總兵



官處整理文書商確機密參謀軍務督理邊儲  
大同則山東參政沈固宣府則參政劉璉遼東  
則參議周願廣西則副使劉紹後滿考陞俸或  
轉京職

叅贊邊務設官始於此

宣宗章皇帝

定會試分南北卷取士例先是

仁宗與侍臣論科舉之弊士竒對曰科舉須兼  
取南北士試卷例緘其姓名請今後於外書南

北二字如一科取百人南取六十北取四十則  
南北人才皆入用矣議定未行

上嗣位始大行之後復分南北中卷以百名為  
率南北各退五名為中卷北卷則北直隸山東  
河南山西陝西中卷則四川廣西雲南貴州及  
鳳陽廬州二府徐滁和三州餘皆南卷

會試取士分南北中始行於此

始遣御史分行天下郡縣清理軍伍時天下軍  
政既久而弊軍之姦黠者往往匿其籍或誣援



良民充伍所司利其賄輒從之  
上知其弊遂命御史四出清理

清軍御史之設始於此

顧佐自為都御史憲度嚴明宿弊清革下至吏  
卒悚厲凜然吏有遭撻者捃撫生過謂受阜隸  
賂放歸悉具姓名訴通政司以聞上密以示楊  
士奇曰爾不舉佐廉乎對曰所訴之事誠有非  
誣蓋今朝臣月俸止給米一石薪炭馬芻咸資  
於阜不得不遣半歸使備所用阜亦樂得歸耕

實官阜兩便此京師大小臣僚皆然臣亦然自  
永樂以來如此

仁宗皇帝因增朝臣之俸

上歎曰朝臣之艱如此因怒訴者

後緣此遂有柴薪阜隸徵銀代役

差監察御史一員巡視在京倉一員巡視通州  
倉一員巡視各處收草一員巡視甲子等庫一  
員提督象牛羊等房錢糧一員巡視光祿寺凡  
內外官員人等多支食料及需索騷擾者皆令



執奏

從楊士奇之請至今因之一年一代云

推陞各部郎中員外郎及御史長史等官六員為各部侍郎總督浙江江西湖廣河南山東山西等布政司及南北直隸府州徵收稅糧巡撫地方以監察御史于謙為兵部右侍郎巡撫河南

各省專設巡撫始此皆以侍郎為之

命南京戶部尚書黃福叅贊南京軍務時楊士

奇等言南京根本之地雖有襄城伯李隆守備其老成忠直如尚書黃福宜令叅贊軍務有事同議而後行庶幾無闕從之

南京兵部叅贊機務自此始

英宗睿皇帝

令浙江嘉湖直隸蘇松等府官田准民田起科每畝秋糧四斗一升以上至一石者減作二斗七升二斗一升以上至四斗者減作二斗一斗



一升至二斗減作一斗蘇州府遂減秋糧八十餘萬石他府有差

官田准民田起科從巡撫周忱之言也

令各省設按察司副使或僉事各一員南北直隸監察御史各一員請勅專一提督學校

始設提督學校官

遣行人齎勅旌江西義民魯希恭等復其家

旌表義民始見于此

宣宗皇帝實錄成大學士楊士奇楊榮俱進少

師楊溥進少保餘進秩有差

廷臣以實錄成進官始此

詔京師各衙門除行在之稱

按永樂初議遷都設六部等衙門各稱行在某部十八年定都于北除行在二字其舊在南京者加南京二字初

仁宗欲回都南京北京各衙門復稱行在至是  
宮殿完仍定都北京復除行在二字遂為永  
制



正月宴天下來朝賢能官布政使丁鑑等于禮部

宴來朝官始此

命內閣官與各衙門會議大政宣德以前每有大事與群臣面議傳旨施行不待批答

上嗣位幼冲面議遂廢至是始命廷臣內閣會議具本奏決

自是以後皆會議具請不復面議矣

景皇帝

以邊圉事殷天下生員納粟上馬者許入監限一千人止其上選事例與歲貢同

按我

朝納粟入監事例濫觴於此後來遂援此例以賑饑甚至援此以接濟工役無止息之期矣

立京營團操法兵部尚書于謙以京師兵馬分隸五軍神機三千諸營者雖各有總兵然不相統一每遇調遣選摘號令不同兵將不相識或



至誤事乃議揀選諸營馬步官軍一十五萬分  
為十營每營各以都督總領每五千用都指揮  
一員每千又用都指揮或用指揮一十五員把  
總每五百名用指揮三十員分管每隊用管隊  
官二員嘗令在營操練統體相維兵將相識出  
征就令原管都督等官統領前去號令歸一行  
伍不亂

京營團操之法始於此

永樂間韃虜來降者多安置于河間保定等處

生養蕃息驕悍不馴方也先入寇之際將乘機  
騷動幾至不可收拾至是發兵征湖貴及廣東  
廣西諸處寇盜于謙奏遣其有名號者厚與賞  
犒隨軍征進事平遂奏留于彼

此數十年積患一旦潛消于肅愍公至計也  
後陳汝言阿順權宦將韃官取回曹吉祥又  
倚用此輩然後知肅愍善於弭患

命左都御史王翱總督兩廣軍務時兩廣寇賊  
擾攘兩鎮將官互相觀望不即討捕故命翱總



督之

兩廣總督之設始於此

增定各鄉試取士額數累朝以來漸增取士額  
順天應天各一百名浙江福建皆六十名江西  
六十五名河南廣東皆五十名湖廣五十五名  
山東四川皆四十五名陝西山西皆四十名廣  
西三十名雲南二十名正統三年景泰元年開  
科皆不拘額數至是以天下人才彌盛始加增  
定順天應天各增三十五名浙江江西福建河

南湖廣山東各增三十名廣東四川陝西山西  
廣西各增二十五名雲南增十名

始定解額後嘉靖十六年雲貴始分雲四十  
名貴三十名

改各處鎮守侍郎為巡撫都御史時議以鎮守  
侍郎與巡按御史不相統屬難於行事文移往  
來亦多窒礙故也

彭公韶曰我

朝初制歲遣監察御史巡按方隅或大災重患



仍遣廷臣行視謂之巡撫迄事而止無定員  
宣德中以關中江南等處地大而要始命官  
更代巡撫不復罷去正統末南方盜起北虜  
犯邊於是內省邊隅徧置巡撫官矣

### 命太監班佑鎮守兩廣

太監鎮守兩廣始此按菽園雜記洪武中內  
官僅能識字不知義理永樂中始令吏部聽  
選教官入內教書正統初太監土振於內府  
開設書堂選翰林檢討正字等官入教於是

內官多聰慧知文義者然其時職專辦內府  
衙門事出差者尚少宣德間差出頗多然事  
完即回後漸干預外政如邊方鎮守京營掌  
兵經理內外倉場提督營造珠池銀礦市舶  
織染等事無處無之

### 吏部奏准聽選監生許給假依限回部聽用

監生回籍候選自此始

兵部觀政進士常熟楊集以書上于謙略曰姦  
人黃竑進易儲之說以迎合上意本為脫身計



耳公等國家柱石乃戀宮僚之賞而不思所以善後乎脫二人死杖下而公坐享崇高柰清議何謙以書示王文文曰書生不知法度然有膽氣當進一級處之遂出為安六州知州

進士選知州始此

英宗睿皇帝

重政元天順

調知鎮江府林鶚知蘇州府時學廟像歲久多剝落者或欲因其舊而加以脩飾鶚奮然曰塑

像非古我

太祖於太學易以木主百年夷俗乃革彼未壞猶當毀之幸遇其壞易以木主有何不可或以毀聖賢像為疑鶚曰此土泥耳豈聖賢耶孔子生於佛教未入中國之前烏識所謂泥像哉況古人席地而坐政不如此於是併易從祀諸賢皆為木主

木主奉祀林鶚獨能行之於蘇若先知焉吏部奏准辦事官放回省祭以次取用



辦事官回籍省祭自此始

上大漸乃處分後事命太監牛玉執筆口占使書其一 東宮即位百日成婚其二定 后妃名分其三命勿以殯御殉葬其四言殯歛器服書畢令牛玉曰將去閣下看令為朕潤色玉至閣李賢陳文彭時驚愴捧誦歎曰所言關大體非

上英明不能及此而止殉一事尤高出古今真盛德事也

至是止殉葬此可謂萬世法也

### 憲宗純皇帝

以順義縣安樂里板橋村原抄沒太監曹吉祥地一所撥為宮中莊田

皇莊之立始此按普天之下莫非王土何必自為私莊私莊一立而司之者曰侵占民地雖屢經科道查勘不能禁止

皇太后壽誕建設齋醮禮部尚書姚夔歛會大



臣收買炷香相率詣寺觀行禮祈福

上香祈福始於此

秋北虜毛里孩入寇延慶等處都御史項忠盧祥與彰武伯楊信嚴禦之虜引去時虜住牧河套秋冬則舉衆為寇春夏則潛退套中歲以為常遠近軍民大被虜掠阿羅出復勾引小王子蒲都魯及乷加思蘭聚衆益為邊患

自是河套遂為虜據

定在京三品以上官員子孫許一人送監讀書

照例出身有志科舉者聽若大臣果有勲勞於國出自

特恩錄用其子孫者不在此限

國初因前代任子之制文官一品至七品皆得廕子一人以世其祿備載於諸司職掌凡職官子孫廕敘正一品子於正五品敘用從一品子於從五品敘用二品以下以是為差後乃漸為限惟三品以上及死王事者乃得錄廕無復前代之濫矣



始立十二團營京營之制國初止有五軍營中  
軍左右掖及左右哨是也永樂初始以龍旗下  
三千胡騎立三千營後征交趾得

神鎗火箭之法立神機營是為三大營居常則  
五軍以肄營陣三千以肄巡哨神機以肄鎗手  
如遇

駕親征則大營居中營外分駐五軍步卒居內  
騎卒居外其外為神機營又其外有長圍各周  
二十里令軍中樵採皆不得出圍外景泰初選

三大營精銳官軍分六十營團操以備警急調  
用是為團營天順初罷立八年復置成化初復  
罷至是復置抽選二大營精兵分為十二營曰  
奮武耀武練武顯武敢勇果勇勁勇鼓勇立威  
伸威揚威振威每營各有坐營把總等官統之  
若遇出征即量調而行三大營所存老弱無幾  
名曰老家兒專備營造差撥等用其十二團營  
益以北直隸各衛及山東河南江北各都司衛  
所精兵共二十五萬實之分為春秋二班團操



聽征

至是有十二營。

定長運法漕運舊例軍民各半互相轉運民運淮安徐州臨清德州水次四倉交收漕運官分派官軍轉運於通州天津二倉往返經年多失農月於是侍郎周忱議將民運糧儲俱於瓜州淮安補給脚價兌與運軍而轉運變為兌運矣至是右副都御史滕昭議罷瓜淮兌運令官徑赴江南州縣水次交兌民加過江船費視地遠

近有差兌運又變為長運至今為定制

按前代之漕運以民今之漕運以軍與其勞民以妨農不若勞軍之為愈也但蘇松白糧猶民自運

經理流民開設湖廣鄖陽府及竹溪鄖西二縣陝西商州及商南山陽白河三縣河南桐柏南召伊陽三縣設撫治都御史行臺于鄖陽統治之從都御史原傑之請也

始設鄖陽撫治都御史



置西廠命司設監太監汪直提督官校刺事

又有西廠之設

命太監汪直監督十二團營

始以內臣監督團營

以山西陝西等處饑荒令被災所在三年六年  
考滿官員納粟預備賑濟四品納米六十石五  
品五十石六品七品四十石八九品三十石雜  
職二十石免其赴部給由惟造完須知功蹟牌  
冊并通關差人繳部從大學士萬安等之言也

始有考滿官納粟之例

吏部尚書李裕奏朝覲考察天下官員乞創立  
才力不及一例行之

舊例考察其沙汰之目曰老疾曰罷軟曰貪  
酷曰素行不謹凡四而已至是裕建言謂違  
鈍似軟偏執似酷二者於老疾不謹復無所  
屬謂宜創立才力不及名目通前為五凡考  
居才力不及者俱照品級調簡僻衙門用

朝廷以其有愛惜人才之意從之自後遂為定



制

孝宗敬皇帝

令州縣選民壯先是天順初令召募民壯鞍馬  
器械悉從官給本戶有糧與免五石仍免戶丁  
二丁以資供給如有事故不許勾丁至是令州  
縣選取年二十以上五十以下精壯之人州縣  
七八百里者每里僉二名五百里者每里僉三  
名三百里者每里四名一百里以上者每里五

名春夏秋冬月操二次至冬操三歇三遇

集官給行糧

始有民壯之選此寓兵于農庶幾成周遺意  
第惜行之者惟從事朋合混編在募頂役而  
已無實用也

復官員給由例

按先是成化甲辰令被災所在考滿官員納  
米預備饑荒賑濟免其赴部至是王恕等會  
題言各官廩祿有限而雜職之俸尤微苟非



取於公必至剝於下貪惰之風由茲而起考課之法廢格不行甚非政體今後考滿者俱令給由赴部照例考覈從之而考滿官員自此復給由赴部

命太子太保禮部尚書丘濬兼文淵閣大學士入內閣典機務

先是召入閣者皆自侍郎而下未有以尚書入閣者尚書入閣自濬始

兩淮等鹽運司鹽引俱於運司召商開中納

銀類解戶部太倉以備邊儲

國初以來天下鹽課俱於各邊開中上納本色米豆商人欲求鹽利於近邊轉運本色以待開中故邊方粟豆無甚貴之時至是戶部尚書葉淇淮安人鹽商皆其親識內與淇言商人赴邊納糧價少而有遠陟之虞在運司納銀價多而得易辦之利淇然之內閣徐溥淇同年最厚淇遂奏准商人引鹽悉輸銀戶部送太倉銀庫收貯分送各邊鹽銀積至一



百萬餘兩入以為利而不知其壞舊法也商人赴邊開中之法既廢近邊米豆無人買運價遂騰湧邊儲自此整理愈難矣

命孔彥繩為翰林世襲五經博士主衢州孔子廟祀彥繩宋衍聖公孔友端嫡派裔孫也友端從宋高宗南渡留居衢州遂以衢州為闕里子孫仍世襲衍聖爵號入元始廢遺祭田五頃至是用守臣言授以是職以便奉祀

衢州亦有闕里論嫡派當誰重也

陞平涼府開城縣為固原州開設總制府總陝西三邊軍務

成化以前套虜未熾平涼固原之間猶為內地得以休息所備靖虜一面耳自火篩入掠之後遂為虜衝於是始改立州治而以固靖甘蘭四衛隸之設總制叅將遊擊等官屹然一巨鎮矣

武宗毅皇帝



整理陝西糧儲戶部侍郎馮清奏改西安延綏  
慶陽等府糧草皆徵折色銀兩解邊

按九邊圖論謂自是邊用益窘遂有米珠草  
桂之謠法不可輕變也如此

古今原始第十四卷終





